

KEGELAPAN

T
a
z
k
i
r
a
h

Tahukah anda kegelapan yang menakutkan? Apabila kita bangun di tengah malam yang gelita, kita mengangkat tangan untuk melihatnya, tetapi kita langsung tidak dapat melihatnya, sedang ia betul-betul dipacak di hadapan kedua-dua anak mata kita!

Tahukah anda kegelapan paling memuncak yang paling menakutkan? Malam yang gelap pekat, anda hanyut di tengah lautan yang luas, di bawahnya adalah kegelapan dalam yang berlapis-lapis, di permukaannya pula kegelapan gelombang menghempas gelombang yang berlapis-lapis dan di atasnya juga adalah kegelapan awan pekat yang berlapis-lapis. Anda mengangkat tangan, lalu anda cuba melihatnya. Anda hanya mampu melihat sebuah kegelapan raksasa seolah-olah anda kudung tanpa tangan!

Anda memerlukan cahaya berlapis-lapis pula untuk melihat kembali tangan anda itu. Itulah bayangan anasir kegelapan yang bertindih-tindih yang menahan cahaya mentari menerobos mata hitam kita. **Anasir yang saling membantu membutakan anda!** Lihat Al Quran, surah An Nur: 40. Rasakan kegawatannya!

Dunia ini adalah gelap. Saksikan alam semesta ini. Kita seolah-olah hidup tercampak di sebutir pasir yang halus di tengah-tengah lautan bebintang tanpa penghujung yang dilihat. Lautan semesta diwarnakan hitam gelap yang menakutkan.

Cahaya yang ada hanyalah bagai bintik-bintik halus (bebintang) yang bertebaran yang tidak memberi sebarang makna untuk memecah kegelapan.

Dunia yang gelap. Kedamaian dan ketenangan pada melihatnya adalah hanya kerana bintik-bintik bercahaya itulah. Jika tidak, di mana keindahan alam semesta? Semuanya gelap.. **Begitu dunia ini, begitulah dunia hati.. Dunia manusia.**

Manusia bangun tidurnya, gerak kakunya dan hidup matinya adalah pada sekeping hati yang berdegup-degup di dada itulah. Baik buruk manusia tergadai pada sihat sakit hati itu.

Hari ini kita adalah manusia yang dipandang. Dulu kita adalah segumpal darah yang tergantung di rahim ibu. Sebelumnya kita adalah satu daripada jutaan sel halus yang merawak-rawak datang tanpa hak memilih takdir dan ketentuan.

Masa itu, di mana tangan, kaki, mata, telinga dan mulut? Di mana hati dan jantung? Kemudian, dari mana sel yang menakjubkan ini? Tiba-tiba ia datang lalu terjun ke alam semesta yang luas terbentang. Maka, maka apa pula tujuannya? Peranannya? Kita datang dari kawasan liputan yang diwarnakan kejahilan. Tak tahu. Tak tahu apa-apa. **Kejahilan adalah kegelapan.**

Kita datang dari lubuk yang gelap, tercampak di dunia yang gelap. Kehidupan yang diwarnakan kejahilan. Apabila si jahil berkata, "aku tahu", maka itulah lapisan kegelapan demi kegelapan demi kegelapan.

Perhatikan pula. Malaikat di langit menunduk ke dunia. Gelap. Pandangan malaikat segera teralih pada bintik-bintik cahaya di muka bumi. Ada cahaya. Ia segera terbang menerpa. Apakah gerangan cahaya itu?

Ia adalah **masjid Allah** yang tersergam di seluruh pelusuk bumi. Malaikat segera melebar sayap mendekati. Ada cahaya lagi! Ia adalah **manusia mukmin** yang sujud pada tuhan bersaf-saf. Malaikat terus mendekati melabuh sayapnya. Ada cahaya lagi! Ia adalah hati yang bersinar-sinar dengan **ayat-ayat Allah** yang di baca siang dan malam.

Itulah cahaya yang ada. Ada di dunia ini. Selepasnya adalah kegelapan. Lihat Al Quran, surah An Nur: 35,36,37,38. Rasakan kemanisannya!

Cahaya adalah Al Quran, mukmin dan masjid. Jadilah penghayat Al Quran, pemakmur masjid dan teman orang yang beriman. Kita dalam cahaya. Cahaya atas cahaya.